

«ՈՂՐԵՐԳՈՒԹՅԱՆ ՄԱՏՅԱՆԻ» ԿԱՌՈՒՑՎԱԾՔԻ ԵՎ  
ՄՏԵՂՄԱԳՈՐԾՄԱՆ ՄԻ ՔԱՆԻ ՀԱՐՑԵՐ\*

ԺԱՆ ՊԻՆՈՒ ՄԱԼԻ (ՃԵԱՆՈՒՄ)

Կարող է անսպասելի կամ նույնիսկ անիմաստ թվալ «Մատյանի»<sup>1</sup> կա-  
ռուցվածքով հետաքրքրվելը, տեսնելով, թե գրությունը ոչ մի պատմողական  
տարր չունի, որ կարողանանք սկիզբը, մեջն ու վերջը շոկել: Ընդհակառակը,  
Նարեկի խոսքը բնորոշվում է անընդհատ և բազմազան կրկնություններով: Չէ  
որ միևնույն վերնագիրը՝ «Ի խորոց սրտի խաւք ընդ Աստուծոյ» կարդացվում  
է Մատյանի 95 գլուխներից յուրաքանչյուրի սկզբում: Իսկ այդ վերնագրին  
կցված է երկրորդ գլխից սկսյալ 94 անգամ միևնույն բացատրությունը. «Վե-  
րըստին յաւելուած կրկին հեծութեան նորին հսկողի առ նոյն աղերս Մաղթա-  
նաց Բանի»: Մակերեսային ընթերցողը կարող է այնպես ընկալել, թե գլուխնե-  
րը հաջորդում են իրար, պատահական հերթականությամբ և նույնանման բո-  
վանդակությամբ: Ինչպես բազմիցս նկատվել է բանասերների կողմից և վեր-  
ջերս Վենետիկում լույս տեսած Գ. Պլըտյանի ուշագրավ ուսումնասիրությու-  
նում՝ «Մատյանի երկայնքին կրկնումը կրանի այլազան կերպերու տակ: Բա-  
ռային համահնչյունություն, նույնարմատ կամ համանուն արմատներու առըն-  
թերակցում, հոմանիշներ, ավելադրություններ, թվարկումներ, նույնաձև, նույ-  
նակառույց նախադասություններ և մտքերու վերադարձ՝ կրկնումի սկզբունքին  
արդյունքներն են»<sup>2</sup>:

Այդ սկզբունքը խարսխված է, մեր կարծիքով, «Մատյանի» դրական սեռի  
վրա: Մատյանը սոսկ պոեմ կամ լոկ գեղարվեստական երկ չէ: Հեղինակը նպա-  
տակ չունի լսողի կամ ընթերցողի միայն միտքն և ուշադրությունը գրավել՝  
իրեն ինչևէ պատգամ հաղորդելու համար, այլ ավելի շատ ուղում է սրտերը  
փոխել, ոգիները զարգացնել, որ գրքի զանազան գլուխները դառնան «սպեղա-  
նիք զաւրաւորք վիրանց անբժշկանաց, դեղք ազդողականք ցաւոց անտեսակա-  
նաց, հնարաւորութիւնք բազմամասնեայ երկանց վտանգից»<sup>3</sup> (վերնագիր): Մի  
խոսքով, «Մատյանն» ունի ոչ միայն քերթողական բնույթ և իմաստասիրական  
թեքում, այլև խրատական, հորդորական կամ, ավելի ճիշտն ասած, հոգեվար-  
ժական նշանակություն: Այդ վարժության մայրն է կրկնությունը: Հոգին վար-  
ժեցնելու համար անհրաժեշտ է հաճախ անդրադառնալ նույն գաղափարների  
և առարկաների: Սակայն վարժությունը իզուր չի կարող լինել: Հետևաբար,  
ինչքան էլ կրկնես, պետք է նաև առաջադիմես դեպի որոշակի նպատակ: Ուստի

\* Կարդացված է իբրև ղեկուցում Միջնդարյան հայ դրականությանը նվիրված միջազգա-  
յին առաջին գիտաժողովում, 1986 թ. սեպտեմբերին:

1 Օգտվում եմ նրևանում լույս տեսած ուշագրավ քննադրերից, թարգմանություններից և  
աշխատանքներից, որոնք վերջին տարիներս շատ են թեթևացրել «Մատյանի» ուսումնասիրու-  
թյունը: Սրանք են՝ Մատյան ողբերգության: Տաղեր, թարգմանություն Վաղգեն Գևորգյանի  
երևան, 1979 (աշխարհարար թարգմանությամբ մեջբերումները, այսուհետև՝ նարեկացի, 1979):  
Մատեան ողբերգության, աշխատասիրությամբ Պ. Մ. Խաչատրյանի և Ա. Ա. Ղազինյանի  
երևան, 1985 (գրաբար մեջբերումները, այսուհետև՝ նարեկացի, 1985): Գ. Բ. Թոսունյան,  
է. Լ. Դեմիրճյան. Հայկական համարաբառ, 8: Գրիգոր նարեկացի. Մատեան  
ողբերգութեան. 3 հատոր, Երևան, 1975—1978:

2 Գ. Պլըտյան, Գրիգոր նարեկացի լեզվի սահմաններուն մեջ. Վենետիկ, էջ 32:

3 Նարեկացի, 1985, էջ 245, վերնագիր:

և այդպիսի նպատակ պետք է ունենա նաև Գրիգոր Նարեկացու Մատյանը, աչքի ընկնող բոլոր կրկնություններով հանդերձ:

Քեպետև շատ դժվար է երկի ներքին կարգը միանգամից ըմբռնել, բայց կարելի է ելնել հեղինակի իսկ հաղորդած տեղեկություններից: «Մտացեալ հիմնեցի, կառուցի, կարգեցի, կուտեցի, արժանացուցի, դիզի, բարդեցի, կացուցի, ցուցի հաստատելով ի հրաշակերտութիւն միագոյ իրի ղբաղմաստեղենան դրուագս դրութեան այսմ սոփերի արգասաւորի, ես՝ Գրիգոր կրանաւոր քահանայ, յետին բանահիւսաց և կրտսեր վարժապետաց»<sup>4</sup>, — կարդում ենք «Մատյանի» հիշատակարանում: Ըստ այդմ, դրությունը, ինչքան էլ բարդ և բազմաստեղնյան լինի, բայց միագոյ և միատարր է, համակարգ կառուցվածքով, որը կարելի է համեմատել հաստատ հիմունքների վրա կանգնած հրաշակերտ արձանի հետ:

Գրիգորն այստեղ ավելին ոչինչ չի ասում իր երկի կառուցվածքի մասին, Սակայն «Մատյանի» ուշադիր քննությունը ցույց է տալիս, որ բաղկացած է երեք մասից, որոնք նմանվում են որոշ շափով միջնադարյան տաճարի շեմքին, սրահին և խորանին:

Վաղուց է նկատվել, թե «Մատյանի» 34-րդ, 75-րդ, 92-րդ և 93-րդ գլուխները շատ տարբեր են մնացածներից: Տարբերությունը մի քանի հատկանիշներից է կախված: Նշված գլուխների ոճը նվազ քերթողական և արձակին ավելի մոտիկ է, քան թե մնացածներինը: Դավանաբանական կամ աստվածաբանական բովանդակությամբ դրանք առանձնանում են Գրիգորի սովորական մաղթանքներից և խոստովանություններից: Այնքան ինքնուրույն են այդ գլուխները, որ Նարեկացու գիտահամեմատական բնագրի կազմողները մնացածների պես չեն տողատել, այլ միակտոր են տպագրել, արձակի պես: Իսկ 1369 թ. Վարազում «Մատյանն» արտագրող Ստեփանոս Արտամետցին 34-րդ գլխի երկրորդ հատվածից առաջ նկատում է. «Գրեցաւ յերից գրոցս զմի գիրքս առաջին», իսկ 74-րդ գլխից հետո. «Արդ գրեցաւ կարողութեամբն Այ երկրորդ գիրքս սբ վդպետին Գրիգորի Նարեկայ, ձեռամբ յոգնամեղ և անարհեստ գրչի՝ Ստեփաննոսի, յիշատակ ինձ և ծնողաց իմոց»<sup>5</sup>: Չենք կարող ճշտել, թե որտեղից է առաջացել «Մատյանի» երեք գրքերի այդ բաժանումը. կարող է լինել հեղինակային<sup>6</sup>, թե՛ պետք է համարել հետագա գրչի խմբագրական վերաբերմունքի արգասիք: Հարցը մնում է առկախ, բայց կարևորն այն է, թե վերոհիշված 34-րդ և 35-րդ գլուխները, ինչպես ժամանակակից, նույնպես միջնադարյան ընթերցողների կողմից համարվել են «Մատյանի» ներքին մեծ մասերի սահմաններ: Արդ, ի՞նչ է այդ բաժանումի նշանակությունը: Գիտահամեմատական բնագրի կազմողներ Ա. Ղազինյանն ու Պ. Խաչատրյանը հիմնականում ճիշտ են կռահել, թե «Մատյանի» հարուստ և բազմաշերտ բովանդակությունը կառուցվածքորեն խարսխվում է միջնադարյան աշխարհայեցողության երեք հիմնական հենասյուների՝ հավատի, սիրո և հույսի գաղափարների արժարժման և մարմնավորման վրա»<sup>6</sup>: Իրոք, այսպես կոչված երեք «աստվածաբանական առաքինությունները» թվարկված են այդ նույն հերթականությամբ Նարեկի 10-րդ գլխում<sup>7</sup> (որը մեջ եմ բերում Վ. Գևորգյանի սքանչելի թարգմանությունը). «Քանզի, արդարև տեսությունն հստակ, իմաստությունը կատարելագույն, մտերմությունը երկնավորի հետ, ճանաչումն Աստծո, մասն. են հավատքի, Այդ երջանիկ ու ընտիր անվան, որ ժառանգվելով մնում է հավետ անեղծ անխափան՝ որպես պատվակից սիրո և հույսի»<sup>8</sup>: Որոշ շափով կարելի է ասել, թե «Մատյանի» առաջին մասը վերաբերում է մարդու դարձին դեպի Աստծուն, այսինքն դեպի հավատքը, և վերջանում է 34-րդ գլխի հավատքի խոստովանու-

<sup>4</sup> Նույն տեղում, էջ 642, հիշատակարան:

<sup>5</sup> ՄՄ, ձեռ. № 5883, էջ 159ա, 339 բ: Տե՛ս Նարեկացի, 1985, էջ 46, 183, 184:

<sup>6</sup> Նարեկացի, 1985, էջ 183:

<sup>7</sup> Նույն տեղում, էջ 283, գլ. 10, 4:

<sup>8</sup> Նարեկացի, 1979, էջ 60:



իյամբ: Երկրորդ մասը վերաբերում է գլխավորապես Աստծու սերը ցույց տվող երախտիքներին, օրինակ՝ Քրիստոսի փրկական կրթերին և արարքներին, հայտնի մեղավորներին շնորհված քավությանը, եկեղեցական խորհուրդներին ևն: Այդ մասը վերջանում է ներկա և ապագա շնորհները բաշխողի՝ մայր եկեղեցու փառաբանությամբ: Երրորդ մասը վերաբերում է գալիք դատաստանին և փրկության հույսին: Վերջանում է հարության առավոտվան սպասող բանաստեղծի հուսալից աղոթքով. «Արեգակն արդար ճառագայթ օրհնեալ, լուսոյ կերպարան, փափագ անձկութեան, Բարձրեալ անքնին, գաւրեդ անպատում, Բարոյ բերկրութիւն, յուսոյ տեսութիւն,... Շնորհաւք քո, գթած, ի քեզ դարացեալ՝ քե նորոգեցայց , Զատեալ ի մեղաց, անմահ կենդանութեամբ՝ ի յարութեան արդարոց, Հաւր քում արհնեցեալ»<sup>9</sup>:

Սակայն այդքանով չի բացատրվում «Մատյանի» կառուցվածքը, որովհետև և հեղինակի իսկ կարծիքով, հավատքը, հույսը և սերը իրարից անբաժանելի են: Հետևաբար ոչ թե առանձին առանձին են գործում «Մատյանի» երեք մասում, այլ ամբողջ երկում՝ սկզբից մինչև վերջն են հիշատակվում մերթ միասին, մերթ հերթականորեն: Նարեկի ներքին կարգը լավ ըմբռնելու համար նախընտրելի է, իմ կարծիքով, մի ուրիշ բացատրություն: Առաջին մասն անժխտելիորեն նախապատրաստական բնույթ ունի, ուրեմն, եթե ամբողջ «Մատյանը» տաճար է, ապա այդ տաճարի շեմքը կամ գավիթն է հանդիսանում: Գավիթը որպես հայկական միջնադարյան ճարտարապետության բնորոշ տիպ տարածված է եղել X—XIX դդ.<sup>10</sup>: Սակայն, շինության տիպից անկախ, Կանոնագիրքը միշտ հրամայել է, որ ապաշխարություն անող մեղավորները որոշ ժամանակ թուղ դրանք ընդ ձեռամբ»<sup>11</sup> մնան եկեղեցին մտնելուց առաջ: Այդպիսի պարագայի ակնարկելով, Գրիգորը գրում է եկեղեցու մասին, թե «այնքան մեծ ունի սրբութիւն, մինչ զի զորս ըստ պատկերի Այ եղեն՝ կանոնաւ խտրէ: Յետ յօգուտ ընտրութեանց փորձից թէ համարձակեսցէ մարդ ոք սխալեալ ի զաւիրքս նորին մտանել՝ ո՛չ պղծի, այլ ընդ անպատրաստիցն թերութեանց դժուարի»<sup>12</sup> կամ էլ, հերձվածողների մասին. «...հերքեալ ի միջոյ, ի բաց հալածեմք... փակեմք ընդդէմ նոցին զկենացն մուտ եկեղեցական ԳԱԻԹԻ»<sup>13</sup>:

«Մատյանի» երկրորդ մասում, եկեղեցու գավթում կամ շեմքին խոստովանելուց հետո, Գրիգորը, կարծես թե, խոստովանում է հավատքը և մտնում է տաճար, որտեղ խորանում է Հին և Նոր կտակարանների գիտության միջ և մասնակցում է խորհուրդներին: Երրորդ մասում, թեպետև նարեկացին երբեք չի նկարագրում ո՛չ դրախտը, ո՛չ դժոխքը, բայց այնքան հաճախ է խոսք լինում ապագա դատաստանի մասին, որ կարծես թե խորանի վարագույրից, այսինքն տեսանելի երկնքից<sup>14</sup> այն կողմը՝ աներևույթ աշխարհի շեմքին է անցել:

Այդ կարծիքը հաստատելու համար անհրաժեշտ է մանրամասնորեն անդրադառնալ «Մատյանի» ամեն մի մասի կառուցվածքին: Առաջին մասը սկսվում է ընդարձակ խորագրով, որի առաջին բառն է ըստ շորս ձեռագրի «դրութիւնք», իսկ ըստ բոլոր մնացածների՝ «դրունք»<sup>15</sup>, ինչ կարելի է այն իմաստով հասկանալ, թե «Մատյանի» «հրաշակերտութիւնը» դուռ ունի տաճարի պես, կամ ինքն իսկ է դուռ «յոզնաթախանձ բանից օգտակարաց», որ կարող է բացել «դրունք ողորմութեանց»<sup>16</sup>:

<sup>9</sup> Նարեկացի 1985, էջ 639—641, գլ. 95:

<sup>10</sup> Տե՛ս Հայկական սովետական հանրագիտարան, հ. 2, էջ 697 («Գավիթ»):

<sup>11</sup> Վ. Ա. Հա կոբյան. Կանոնագիրք հայոց, հ. Ա, Երևան, 1964, էջ 171:

<sup>12</sup> Նարեկացի, 1985, էջ 551 գլ. 75, 9:

<sup>13</sup> Նույն տեղում, էջ 389, գլ. 34, 9:

<sup>14</sup> Նույն տեղում, էջ 382, գլ. 33, 6:

Ch. Mercier. Les canons des conciles oecuméniques et locaux en version arménienne. REArm N. S, 15, 1981, p. 213.

<sup>15</sup> Նույն տեղում, էջ 245 (վերնագիր) և 975:

<sup>16</sup> Նույն տեղում, էջ 515 գլ., 67, 3:

Այդ սղուռն» անցնելուց հետո կարելի է առանձնացնել շորս ենթաբաժին. ա) նախ և առաջ առաջին ինը գլուխներում Գրիգորը բացատրում է գրքի նպատակները: Դատաստանի առաջ ունեցած արհամարհող զսպելով, որոշում է խոստովանել ոչ թե բոլոր ախտ ու մեղքերը, որոնք անհամար են և մտովին անգամ անընդգրկելի, այլ միայն գլխավորները<sup>17</sup>: բ) 10—18-րդ գլուխները սահմանում են մարդկային ոգու վերականգնումի կամ փրկության պայմանները. առաջին հերթին անհրաժեշտ են աստվածաբանական երեք առաքինությունները՝ հավատքը, հույսն ու սերը: Դրանց մեջ բերվում են Աստվածաշնչից քաղված օրինակներ (10—14): Դրանից հետո բնութագրվում է բժիշկ Քրիստոսի փրկարար գործունեությունը (15—18): գ) 19—28-րդ գլուխներում Գրիգորը սովորում է ողբալ՝ շարիքից հրաժարվելու և քավություն ստանալու համար: Չարիքի պատճառը ոչ թե Աստված, այլ մարդու ապստամբ անձնիշխանականն է: Ուրեմն պետք է մարդկային սնապարծությունը խոնարհեցնել և անձնական թերություններին նայել թափանցիկ հայացքով: Այդ գործին կարող են նպաստել բանաստեղծության բնորոշ միջոցները՝ այլաբանությունը և ամենից առաջ հանգն ու նմանաձայնությունը: Օրինակ, 21-րդ գլխում, ոգին քայքայող ախտերը համեմատվում են ուտիճի հետ, իսկ 23—26-րդ գլուխները հայ բանաստեղծության առաջին հանգավոր երկերից են: Սակայն Գրիգորի կարծիքով ամենից հոգեպարարն է տողերի սկզբում ու վերջում միևնույն բառը՝ «մեղա» շարունակ կրկնել, ինչպես իսկ պատահում է 27-րդ գլխում: Միայն այդ մեթոդով է բանաստեղծին հաջողվում «դիվական շերմատենդը սաստել... որպեսզի փախչի մարդուց՝ զարհուրած»<sup>18</sup>: դ) 29—34-րդ գլուխներում Գրիգորն ապաշխարություն է անում, մասնակցում հաղորդության խորհրդին (32-րդ գլխում), ներկայանում սուրբ պատարագին (33-րդ գլխում) և խոստովանում հավատքը հոծ բազմության առջև (34-րդ գլխում): Այդպես ավարտվում է «Մատյանի» առաջին մասը, որը, բառի բուն նշանակությամբ, ներածական բնույթ ունի, որովհետև իրոք, ընթերցողի ձեռքից բռնած, Գրիգորը սովորեցնում է դատաստանի երկյուղը զսպել և ներածում է տաճարի մեջ:

Շատ ավելի բարդ է երկրորդ մասի կառուցվածքը: Աչքի է ընկնում, թե որոշ գլուխներում հեղինակը մեկնաբանել է Հին և Նոր կտակարանների երկար դրվագներ, մինչև անգամ ամբողջական գրքեր. օրինակ՝ Սաղմոսարանը՝ 60—61 գլուխներում, Բանք ժողովողի և Սողոմոնին վերագրված ուրիշ գրություններ՝ 48-րդ գլխում, Քրիստոսի կրքերը՝ 36 և 66 գլուխներում ևն, պարզ է, որ Գրիգորը ուղղում է խոսքը ավելի վարժված ընթերցողի և բոլորովին չի վարանում աստվածաբանական և սուրբգրագիտական դժվար գիտելիքներ հաղորդել:

Իմ կարծիքով կարելի է զատորոշել շորս ենթաբաժին. ա) 35—44-րդ գլուխներում հակադրվում են ներկայիս բաշխվող Աստծու շնորհի և ապագա դատաստանի գաղափարները. բ) 45—53-րդ գլուխներում արծարծվում է այդ հարցը նախ անհատի, իսկ 50-րդ գլխից՝ ամբողջ մարդկության տեսանկյունից, թե ինչպես կարելի է, մեղավորի հոգում, Աստծու այն պատկերն ու նմանությունը վերանորոգելը, որը եղել է սկզբում՝ արարչության ժամանակ, ըստ Գիրք Մենզոցի. գ) 54—63-րդ գլուխներում քննարկվում է, թե ինչ արժեք կարող է ունենալ նորանոր հանցանքներ գործող մարդու աղոթքը: Քրիստոսը նախատեսել է, որ մարդը պետք է նորից մեղանչի քավություն ստանալուց հետո: Հետևաբար, հարկավոր է ոչ թե արդարությունը հպարտանալ, այլ մեղքերի խոստովանքը նվիրել, թշնամիների համար աղոթել և անձնական անարժանությունը գիտակցելով՝ հանդերձ՝ Դավիթ սուրբ թագավորի և մարգարեների ավանդած մաղթանքներն արտասանել. դ) 63—74-րդ գլուխներում Գրիգորը բացատրում է, թե լավ է հիմա ինքնապարսավ լինել և բոլոր թերությունները մերկացնել, քան թե լուռ մնալ՝ դատաստանի օրվանը սպասելով: Այն ժամանակ միանգա-

<sup>17</sup> Ն ա ր ե կ ա ց ի, 1979, էջ 40, գլ. 6, 3:

<sup>18</sup> Նույն տեղում, էջ 172, գլ. 28, 5:



մից ամեն ինչ կհայտնվի և ոճիրները թաքցնող հանցավորն անողորբաբար կզատապարտվի, մինչդեռ անկեղծ խոստովանողը, հենց հիմա, դատարանից նախօրոք կաղատվի: Բայց, ըստ միջնադարյան մտածելակերպի, կանխավ դատապարտելու կամ աղատելու իրավունք ունի եկեղեցին, որի փառաբանությունը ավարտվում է «Մատյանի» երկրորդ մասը:

Երրորդ մասը վերաբերում է աշխարհի վերջին օրվան և նոր կյանքի ակրնկալությունը: Կարելի է առանձնացնել երեք ենթաբաժին. ա) 76—79-րդ գլուխներում նկարագրվում է նոր աշխարհի հանդես դալը: Նոր լույս է ծագել ավագ ուրբաթ օրը, հետևաբար հավատացյալները պետք է նորոգվեն, իսկ հին աշխարհը պետք է ընկնի. բ) 80—83-րդ գլուխներում խնդրվում է Աստվածածնի, հրեշտակների, առաքյալների, մարտիրոսների և բոլոր սրբերի միջնորդությունը ոչ միայն Գրիգորի, այլ նրա բարեկամների և թշնամիների համար: Քերթողական միջոցներով «Մատյանի» այս հատվածն ընդօրինակում է միջնադարյան նկարչությունում տարածված Դեյսիսի, այսինքն աղերսանքի տեսարանները. գ) 84—95-րդ գլուխը կարծես թե անցավոր ժամանակը թողած հավերժություն են մտնում աստիճանաբար: Արտասանելով առավտովա աղոթքը (84), Գրիգորը խնդրում է, որ Աստու օգնությամբ իր սկսած գործերից և առաջարկած նպատակներից երեք չշեղվի (85): Մաղթում է ներումն ստանալ իր կյանքի երեք հասակներին (87) և լսվել նույնիսկ իր մահվանից հետո՝ «Մատյանի» միջոցով, մինչև աշխարհիս վերջին օրը (88): Վերջին անգամ խոստովանում դեպի Քրիստոսն ունեցած հավատքը (89, 90). երեկոյի աղոթք է ասում (91, 94), դարձնում է հարուստ աներեկ առավոտը (86, 95):

Մատյանի այդ վերջին գլուխներին կցվել են 92-րդ և 93-րդ գլուխները, որոնք այնքան երկար են և այնքան տարօրինակ բովանդակություն ունեն, որ հմուտ բանասերները կարծել են, թե այդ գլուխները «Մատյանին» չեն պատկանել, այլ պատահաբար են դրան միացվել հետագա տգետ գրիչների կողմից: Այդ կարծիքը հերքել են Ա. Ղազինյանը և Պ. Խաչատրյանը, ուստի և դրան անդրադառնալու կարիք չկա<sup>19</sup>, նկատենք միայն, թե խորհրդանշական իրենց խրթին իմաստով այդ երկու գլուխները սերտ կապ ունեն մեռելոց հարուստի միջնադարյան գաղափարի հետ: 92-րդ գլխում փառաբանված ժամհարը համեմատվում է խաչի՝ այսինքն կենդանության ծառի հետ: Նրա ձայնով մարդը դարձնում է դիվական քնից՝ մահվանից: Իսկ 93-րդ գլխում դրվատվող սրբալույս մյուռոնը համարվում է անմահության օժում, մշտնջենական երանության առհավատչյալ:

\* \* \*

Մատյանի կառուցվածքի այս հակիրճ տեսությունը ցույց է տալիս, որ մնացած գլուխներից ձևով և բովանդակությամբ տարբերվող 34-րդ, 75-րդ, 92-րդ և 93-րդ գլուխները ոչ միայն պատկանում են պոեմին, այլ ընդգծում են դրա հիմնական բաժինները: Այդ հանգամանքից ելնելով կարելի է, թերևս, մի վարկած առաջարկել նարեկացու գլուխգործոցը երբ և ինչպես ստեղծվելու մասին: Հիշատակարանում Գրիգորը պատմում է, թե կազմել է «Մատյանը» «ի յաւարտումն կատարման իններեակ յոթելինին, ի սկիզբն պսակելոյ մտի տասնեկին յարեթական տոհմիս տումարի»<sup>20</sup>, այսինքն 1002 թ.: Այն ժամանակ հռոմոց մեծ կայսրը՝ Բարսեղը, Տայքի շրջանները գրավեց և ընդոտնեց եկեղեցու թշնամիներին՝ այսինքն թոնդրակեցիներին<sup>21</sup>: Գրիգորը, ինչ խոսք, դրանից կարող էր միայն ուրախանալ թե՛ որպես իշխանազուն և թե՛ որպես վարդապետ, դասակարգային և կրոնական պատճառներով: Ոչ միայն ուրախացավ, այլ և մասնակցեց պայքարին գաղափարական զենքերով, հորինելով հակաթոնդ-

19 Ն ա ր Ե Կ ա ց Ի, 1985, էջ 1111:

20 Նույն տեղում, էջ 642, հիշատակարան:

21 Նույն տեղում, էջ 389, գլ. 34, 10:

րակյան ճառեր, որոնց թվին պետք է դասել «Մատյանի» 75-րդ, 92-րդ և 93-րդ գլուխները: Թոնդրակեցիները մերժում էին եկեղեցու նյութական շենքը և եկեղեցական խորհուրդները: Արդ, Գրիգորը ոչ միայն գովում է եկեղեցին (75), այլև եկեղեցու ամենաշնչին գործիքը՝ ժամհարը (92) և ամենապատվավոր խորհուրդը՝ մյուռոնը (93): Չի կարելի բացառել, որ 34-րդ գլուխը նմանապես հակաթոնդրակյան նպատակ է ունեցել, բայց դրական նշան չեմ գտել այդ ենթադրությունը հաստատելու համար:

Նետևաբար շատ հավանական է, որ Գրիգորը «Մատյանի» 75-րդ, 92-րդ, 93-րդ և թերևս 34-րդ գլուխները գրել է 999 և 1002 թթ. միջև, այսինքն անդորրության միջոցի, յորում եզերեալ ընդոտնեցան թշնամիք եկեղեցւոյ»<sup>22</sup>: Բայց կարող ենք արդյոք պատկերացնել, որ մնացած 91 գլուխները ստեղծվել են միևնույն ժամանակաշրջանում: Այնքան բերրի և հանճարեղ բանաստեղծ է եղել Գրիգորը, որ կարող էր, անշուշտ, շատ կարճ ժամանակվա մեջ հիանալի գործ կատարել: Սակայն «Մատյանն» այնպիսի մի անհուն երկ է, որ ամփոփում է ոչ միայն մի անհատի ամբողջ կյանքը, այլև ամբողջ ժողովրդի, ամբողջ մարդկության հոգևոր փորձառությունը: Ուստի և ավելի հավանական եմ համարում մի ուրիշ վարկած:

34-րդ գլխում Գրիգորը հաղորդում է, թե «բազմաբ պաղատեցայ տրուտաւք (կամ, ըստ հնատիպ գրքերի՝ դրուակաւք) խանդաղատականաւք, որ ոչ դրեալ ի յայս կարգ ձայնի»<sup>23</sup>, Կարելի է այդ նախադասությունն այնպես ըմբռնել, թե «Մատյանը» կազմելուց առաջ հեղինակը հորինել է շատ դրվատիքներ կամ դրվագներ, որոնք բաց է թողել, նպատակահարմար չհամարելով մնացածներին միացնել: Եթե ճիշտ է այդ նկատողությունը, ապա պետք է գատորոշել առանձին գլուխները ստեղծելու և դրանք «Մատյանում» ժողովելու ժամանակները:

984 թ., հորինելով Ապարանքի սուրբ խաչի պատմությունն ու դրան կըցված Սուրբ Խաչի և Աստվածածնի ներբողները, Գրիգորը տիրանում է բերթողական ձիրքի բոլոր միջոցներին: Հաջորդ քսան տարիների ընթացքում գրում է ոչ միայն մնացած ներբողները, թերևս գանձերից և տաղերից մի քանիսը, այլև, հավանաբար, զանազան առիթներից առաջացած, իրեն համար վերապահված, կամ Հովհաննես եղբորը և նարեկավանքի աբեղաներին ուղղված առանձին դրվագներ, որոնք հետագայում կհավաքվեն «Մատյանում»:

Այդ դրվագները հորինելու առիթների մասին բնագրից իսկ կարելի է իմանալ: Առաջին հերթին եղել են Գրիգորի առօրյա ընթերցումներն ու խոկումները: Նրինակ, 77-րդ գլուխը գրվել է ավադ ուրբաթ օրը: 53-յո՞րդ գլխում բանաստեղծը մեջ է բերում Եղիշեի մի հատված, որի հետ չի համաձայնվում: 27-րդ գլխում կարծես թե նայում է Քրիստոսի պատկերին, իսկ 29-րդ գլխում ասում է, թե Քրիստոսն անձամբ երևացել է իրեն տեսիլքում: Երկրորդ՝ հեղինակը որոշ գլուխներ է գրել եղբորը մխիթարելու համար, որի մասին նշվում է 51-րդ գլխում, թե «ինքն է կարոտ փնտրելու անդորր սեփական անձին»<sup>24</sup>: 12-րդ գլխի նման դրվագներ կարող են իրոք հորինված լինել Հովհաննեսի անձկությունները փարատելու համար: Երրորդ՝ որոշ գլուխներ ուղղված են եղել հատկապես աբեղաներին: Օրինակ, 72-րդ գլխում Գրիգորը պատմում է, թե «Անաստորժ: Բայց անպարտ մեկի բերանից խոսքն այս անհարմար ուղղված հենց նրան, որի առաջ և ոչ մի երկրածին մարդ արգարանալ բնավ չի կարող: Զննացա ու չպոռնկացա երբեք իմ կյանքում... սա էլ է կոչվում անօրհնություն»<sup>25</sup>: Այդ անհամեստ խոսքն ասողը եղել է անշուշտ ոչ թե աշխարհիկ մարդ, այլ խոնարհություն կոչված առաքինությունը շիմացող աբեղաներից

<sup>22</sup> Նույն տեղում, էջ 642, հիշատակարան:

<sup>23</sup> Նույն տեղում, էջ 389, գլխ. 34, 10: Բնագրագիտական հարցի մասին տե՛ս էջ 104, 2, ծան. 13:

<sup>24</sup> Նարեկացի, 1979, էջ 302, գլ. 51, 1:

<sup>25</sup> Նույն տեղում, էջ 441, գլ. 72, 2:



մեկը՝ Վանականները պարտավոր են եղել ամեն շաբաթ ամբողջ Սաղմոսարանը կարդալ: Այդ առիթով են գրվել 60-րդ և 61-րդ գլուխները:

Վերջապես, որոշ գլուխներ վերաբերում են Գրիգորի և ժողովրդի հանդիպումներին: Օրինակ, 3-րդ գլխում նկարագրվում են միջնադարյան Հայաստանի հասարակության զանազան շերտերն ու դասակարգերը: 33-րդ գլուխը հորինվել է մարդկանց հոծ բազմության առջև մատուցված պատարագի առիթով: 72-րդ գլխում Գրիգորը գանգատվում է, թե ժամանակակիցները կոչել են իրեն բաբբի, սուրբ և բարի. իրոք, կարելի է ենթադրել, որ սրբության համբավը լայն էր տարածվել՝ վտանգելով իր հոգեկան անդորրությունն ու համեստությունը:

Ընդարձակ վերնագրից իմանում ենք, որ «Մատյանը» կազմվել է «ի խնդրոյ հայցման հարց միանձանց և բազմաց անապատականաց»<sup>26</sup>, Բանն այն է եղել հավանաբար, որ 1002 թ., երբ որ Գրիգորն ուզել է հրատարակել Բարսեղի հակաթոնդրակյան արշավանքի առիթով իր գրած ճառերը, նարեկավանքի արեղանները ոչ միայն առիթից օգտվել են բանաստեղծին հորդորելու, որ ժողովածուի ձևով հավաքեր և հրատարակման պատրաստեր նաև ավելի մտերիմ բնույթ ունեցող իր ստեղծած «ի խորոց սրտից խաւսք ընդ Աստուծոյ», այլև այդ գործում իրեն օգնելու համար նշանակել են հարազատ եղբորը՝ Հովհաննեսին, ինչպես իմանում ենք հիշատակարանից<sup>27</sup>: Այդ ժամանակ է Գրիգորը հղացել «Մատյանի» կառուցվածքը, Հովհաննեսի քարտուղարությամբ հավաքելով և խմբագրելով արդեն հորինված նյութերը, նոր գլուխներ ստեղծելով և հակաթոնդրակյան ճառերից օգտվելով երկի գլխավոր բաժանմունքները նշելու համար:

Այսպես կարելի է բացատրել, մեր կարծիքով, «Մատյանի» միաժամանակ «բազմաստեղանի» և «սակավամասնյա» կառուցվածքը, պատմական այժմեականության հետ ունեցած սերտ կապերը և անժամանակ, համամարդկային, մշտնջենավոր նշանակությունը:

<sup>26</sup> Նարեկացի, 1985, էջ 245, վերնագիր:

<sup>27</sup> Նույն տեղում, էջ 642, իշատակարան: